

四庫全書

集部

欽定四庫全書

文簡集卷八

明 孫承恩 撰

賦

一統地理圖賦

客有好事者問思宇宙之內封壤之間自混沌之既分
兮爰奠位乎黃玄惟乾坤之覆載兮吾不知寰宇之邈
寬遹皇明之統馭兮同車書於八埏幸生太平之盛世

兮顧乃守環堵以窮年不有負於此生兮空沒齒於閭閻景太史之芳躅兮欲極遠而遊觀於是羸金裹糧簡徒治裝辭井邑去故鄉陸而車馳水而舟航翱翔乎天下遍歷乎遐方涉堯封之蕩蕩究禹迹之茫茫先幽薊以窺神州之佳麗兮實天府之上國萃衣冠於輦轂兮來玉帛於殊俗瞻居庸之險阨兮列羣山而雄峙衆水效其朝宗兮拱帝都之形勢次豫州以觀四達之會兮為天下之土中覩河洛而思聖勲兮勺鼎湖而想遺弓

弔漢楚之戰場兮升北邙之坡陀
陟首陽之層巔兮詠採薇之高歌
感洙泗之遺化兮彷徨乎鄒魯之墟
拜闕里之尊崇兮仰日觀之巍巍
循漢祖就國之道兮覽關中之奧壤
挹終南太白之秀特兮出虎牢潼關之雄壯
想前代之故都兮同傳馬之更馳
弔賢君哲士之陵墓兮蔓烟草之離離
履烏道之崎嶇兮識石門之險固
詫三川之環紮兮壯峨眉之重阻
冒瞿塘之深險兮瞻劍閣之倚天
究蠡叢魚鳧之往迹兮亦已茫昧而無傳
歷

山川之迢遞兮抵荆楚之名區登峴山而懷古兮剔荒
鮮於殘碑尋故壘於赤壁兮快周郎之奇功濟汨羅之
清流兮哀三閭之孤忠泝大江而抵建康兮窺牛渚而
挹天門釣明月於水底兮呼李白於江心臨石城之虎
踞兮望鍾山之龍蟠慨宇宙之有此都兮不知興廢之
幾遷經吳會之故國兮悵康廬之遊姑蘇浮震澤之浩
瀾兮嘗松江之蓴鱸攀會稽之巉岩兮探禹穴之幽深
凌胥濤之洶湧兮持一樽以酌鴟夷之英魂揚舲於彭

蠡之湖兮艤舟於潯陽之浦覽洪都而宴傑閣兮想昔
時之歌舞濯瀑流於玉峽兮攬秀色於匡廬唁二姑之
與彭郎兮果傳言之有無遍足跡於閩粵兮盡東南之
都會過劍津之溶溶兮拜武夷之精舍訪南越之勝概
兮弔五羊之故墟度藍關之屈曲兮躬展拜於韓祠泛
湘水之悠悠兮翫蒼梧之雲烟悼妃子之遺恨兮遺竹
上之斑斑窮滇國於南荒兮盼金馬碧雞之崔巍顧林
木之參差兮恍武侯征南之旌旗繫足跡之所極兮盡

六合而無遺企九垓與九垓兮越四方而超四維晞吾
駿於暘谷兮憩若木之華滋斥勾芒以先驚兮馭東皇
而導之吾究羲和之所沒兮睨虞淵之沉沉吾斥魯陽
以揮戈兮陽告余以莫任指交州以南驚兮蹇余覲夫
祝融冒毒瘴之冥冥兮又曷可滯余之行蹤極幽都之
陰陰兮勘玄冥之所都羌墮指與裂膚兮凜冰山雪嶺
之嵯峨荷神天之槩相兮似諒余之勤劬經九死之無
恙兮幸生返於鄉閭於是翩翩然歸充然若有所得侈

然自以為功身居蓬華心遊鴻濛覩江山於目睫兮恍
歷歷於胸中昔天涯而今環堵兮歎萍梗之行踪夢魂
依依而靡定兮恍高舉而飛翰時過都而越邑兮亦涉
水而登山念斯遊之不再兮恐遺亡於他日今不有以
識之兮後必難於記憶揭圖用存夫梗槩兮欲常常而
在茲俾不時而省覽兮庶歷久而不遺紀聖明大一統
之幅員兮欲以侈今而示後於以張皇乎幽眇兮傳盛
事於悠久於是閱禹貢披職方撿山經之所載兮考地

志之所陳參昭代之書志兮質以茲遊之所經乃邀陳
玄於絳邑兮招毛穎於管城來弘農之陶泓兮致會稽
之褚生斟酌酬度商確計評勞心苦思竭精費神豈為
億料而想像實乃歷覽之親曾爰布爰列載摹載勒上
下奠置左右規畫泓也贊思褚也紀集穎也纂錄玄也
潤色泄元氣於手底吐玄機於胸臆分界域之向背兮
定道里之遠近辨分野於毫釐兮正封疆於方寸寰以
四海奠以中央總九州於內區限四夷於外邦表皇畿

以為極列方岳以為綱都邑井然而錯峙丹青炳乎其
輝煌奠大川以通道兮紀名山以作鎮上下截然其甚
明兮嚴君臣之大分顧兼舉而並錄兮見一統之無餘
盡日月之出沒兮何非聖明之與圖囿八荒於我闥兮
納四海於斗室邈遐陬之寥廓兮益一覽而可悉固不
待出夫戶庭兮而殊方絕域舉意可至於瞬息是雖無
知之童孺兮亦能按之而指識間以示人莫不目豁心
釋賞其用心之勤服其運思之密見宇宙之大全得萬

里於咫尺有識微先生者從而為之歌曰於惟皇明有
九有兮蕩蕩幅員莫古右兮偉哉斯圖吾深取兮區區
芹曝效畎畝兮願將一本獻我后兮皇皇令緒慎保守
兮百千萬年此宇宙兮以及斯圖垂不朽兮又歌曰茫
茫海宇莫大器兮我君我相勞奠置兮八荒雖遠一覽
既兮豈曰徒然寓深意兮詳於中域密內治兮畧彼要
荒別外裔兮於此可見經濟具兮先天下憂分內事兮
推以為治運掌易兮寶哉斯圖勿輕視兮

憫已賦

慨余生之屯剝兮，
眠兀坐而躊躇。
念心事之多睽兮，
漫彈鋏而長吁。
昔余既有此生兮，
承鞠訓於嚴慈。
蹈忠信以為履兮，
紉蕙蘭以為衣。
悲吳蒼之弗弔兮，
降荼毒於冲人。
叩辜愆而無所兮，
何天高而地深。
痛終天之永隔兮，
抱冰炭而莫言。
瀕九死而一蘇兮，
幸微息之僅延。
歲冉冉其不居兮，
倏寒暑之屢催。
紛人事之沓至兮，
慨門戶之就衰。
思繼述之維艱兮，
恐余力有不任。
航一葦於

巨川兮益淼淼兮其無津既不能傭力為工賈兮又不
能為胼胝之黔黎誦遺書而自誓兮謂立身具在斯鞭
駑鈍而疾驅兮勤朝夕而靡遑窺百氏之浩瀚兮汴千
古之茫茫自余既粗有知兮妄意青雲之可易致欲自
見於明時兮紹箕裘之遺緒應賓興而歌鹿鳴兮遂觀
光於帝都奄長風而北征兮陪羣英而並趨呈琅玕而
叫閭闔兮欲廁夫重瞳之一彀何造物之戲人兮嗟一
敗而莫救期鵬搏而鳳騫兮乃鷁退而鴈伏謂容與而

翱翔兮乃顛躓而躑躅豈得喪之難必兮亦勝負之靡
常意擗櫟之庸材兮固難以登夫廟廊憫素志之既違
兮恒偃蹇而悲窮何余心之褊迫兮益凜乎其不自容
怵抑鬱其憑中兮抱耿耿而莫語匪敢怨尤乎天人兮
恐年歲之不吾與亦知夫古人所貴無悶兮幾抑制而
罔措豈功名之誘人兮非排遣之能去悵關山之迢遞
兮瞻白雲之飛飛夢青鷄之彩服兮奉晨昏於慈闈既
通塞之有時兮亦何事乎棲棲尋舊業以藏修兮不有

先人之弊廬舒長笑而去國兮駕扁舟而南適恐江山
之笑人兮何去之匆匆而返之寂寂守田園而窮處兮
仰君門於九天悼初志之牢落兮徒掩抑於逝川懼孤
陋之莫進兮來卒業於成均鼓篳篥而遊歌兮叨列天
下之俊英何閭閻而秩秩兮益於是而得乎大觀嗟余
身之渺渺兮愧望洋而永歎惟九稼而不一穫兮豈無
若人之淹留顧涼薄之何能兮乃冀朝種而夕收返內
省之甚歉兮莽荆榛之荒翳望修途之無涯兮奚一蹴

之可至水悠悠而東馳兮日瀏瀏而西翥往者既不可
追兮姑再圖夫後舉東此志而弗怠兮何金石之為堅
誓將以遠到兮寧懼夫九折之摧吾轅謂玄化之杳冥
兮固窮達之難占委吾生於大順兮置欣戚於自然噫
噓嘻天生我兮謂何天抑我兮謂何有弛斯張兮理固
不與來不可拒兮去不可弋居易俟命兮君子所多貞
途安履兮不激不阿冥行妄趨兮此理則那韶鄭迭奏
兮孰察貞訛明明在上兮求無我詫詘勉終歲兮惜此

逝波優哉游哉兮聊以永歌

風雨阻歸舟賦

忽乎其驟至也如狂瀾驚濤逆走橫擊千兵萬馬奮迅
馳突聞雷聲揚威怒赫飄忽泐滂揮霍叱吸撼谷振
山撼木蹙石寒日無輝黯慘將匿同雲四興彌滂濩密
急雨如注砲衝矢集白浪涵騰回波蕩潏孤楫軒舉抑
退偃側惶惑錯遽莫進咫尺率水許而安之聊靜坐以
少息謂恬霽於移時乃顛冥於終夕張餘威而未殺鬪

猛勢其尤力嗟乎我歸自東如鳥倦翼中心忉忉憂思
何極恨縮地之未能欲兼程而併日何天意之無知假
風雨以橫逆言念故廬甚邇匪遑悵悵白雲千里斯隔
鬱如其焚我心恐盡莫能奮飛袖手無策擁寒衾以孤
吟兮羌睫淚之欲滴仰玄穹而長歎兮惟神明其鑒識

龍洲介壽賦

龍洲翁宦遊四方歸老故鄉山焉徘徊水焉徜徉付名
利於不競樂子姓以成行乃屠維大荒落之仲春兮會

四陽而獨盛占大壯以利貞兮配夾鍾而律應實惟中
和之令節兮紛庶物以憑生皇覽揆於初度兮乃是月
而降生繫天生人之不無意兮顧得之以為壽徵遭花
甲之幾週兮羌復遇夫茲晨於時震木之位鶉首之躔
發靈吐祥煥彩炳烜少微歛其燁燿兮南極炫其芒熒
眇聯輝而並燦兮騰爚煒於層霄祥光炳其下燭兮瑞
氣靄其盈庭吐光曜以綿亘兮垂景艷之忻忻乃闢玳
筵之翼翼兮萃嘉賓之至止日既吉而辰良兮壽域開

而宴喜繚青雲以為屋兮舒絳霞以為茵曳翠幄之檐
檐兮颺惠風以氤氲建雄虹之彩燭兮五色雜而華敷
蕤沉檀之冉冉兮排玉戶而襲金鋪挽天河以為漿兮
傾斗柄以為杓指南山以作案兮斟北海以為醪乃有
曼倩獻桃麻姑臂脯儼鶴鹿以成行兮紛馴擾而儀舞
叱宓妃而鼓瑟兮揮秦女而吹簫容成趨蹌為余度曲
兮王母欣然而彈瑯璈羗仙韶之並奏兮凌天風以逕
度隔人世之風塵兮又何羨乎瓊洲與瑤圃繫獻酬之

既洽兮紛屢舞之傒傒何笑言之孔樂兮綴明月而成
辭齊捧觴而上壽兮致慇懃而有述究長生之有要兮
審一氣之和德發金匱之珍訣兮抽石室之玄英曰吾
惟不勞形而搖精兮保神明之清澄吾不能吸日月之
光華兮殮沆瀣之精醇虛以為受兮靜以自存豈必絕
人而獨立兮效羽人之長生荷至言之覺迷兮舉忻然
而有得再捧觴以致謝兮忽不覺有詞之成什乃歌曰
曲正揚兮酒未終兮持此清醕壽此翁兮願公之壽同

太公兮翁亦載歌曰惟衆君子善祝兮惟余耄荒慚慙
兮荷我后王貽我穀兮仰惟靈修錫我福兮顧茲優游
何不足兮於是衆客陶然既樂頽然就醉攜扶而歸尤
覺香風之飄袂也

貪鼠賦

正德庚午十月十九日余歸自海寧買舟長安
舟人畜一鷄甚馴夜半為鼠啗死捕而箠
殺之明早烹而食焉有感其事濡毫作賦

此有雞雛舟子所惜飲啄以時不懼不逼晝而出嬉宵
棲於樊雖警曉之未能亦啄粒之靡閒中夜祟作鼠闖
其穴嚙頸及足搗毛洒血急起赴之已無濟矣發而視
之全然斃矣索此竊者寂然逝矣廢雞而歎默坐以俟
有物款款於樊之裡起而燭之則向之鼠睥睨睢盱欲
舉雞去急窒其穴一捕而獲雖有捷足莫克走脫於是
按張湯之法律奮李龍之毒手決脇潰腸碎骨裂首剝
之烹之入舟子之口嗚呼噫嘻余嘗聞之物之甚狡莫

與鼠匹晝伏夜動善避巧匿蘇駭其黠盧歎其劇爾雅
所載品類靡一或舜端門或穴神丘名鼯者詩人所刺
託社者齊相所憂是鼠之巧物莫與侔斯獨何為遺是
禍尤抑余聞之神龍天飛變化乃全童子狎之有欲則
然雀以食羅魚以餌誤蛾以明而見焚猩以酒而致仆
凡物殞生孰匪欲故今是鼠欲竊食以肥身而身翻為
人之所食也矜小智以掩人之莫覺而不虞為人之所
識蹈危機而罔測臨利害而弗避也為口腹以喪軀則

亦惡在其為智也究物性之致然兮因亦貪之為害也
抽余思而作賦兮用以示夫人之戒也

修德應天賦

有疏不果進

謹奏為慎修省以弭天變事臣惟人君一身與天地
相為流通人事感於下則天道應於上是故君以五
事天以庶徵休咎之殊灾祥之異皆由於君公卿百
執事不得而與焉是以人君之尊實與天地參其行
事誠不可不謹斯理斷斷有不誣者伏覩今歲夏秋

之間京師淫雨為虐引月決旬天時鬱蒸人多疾病
米價湧貴饑民嗷嗷田禾將登漸有涸爛盜賊生發
行旅艱難臣又聞淮濟一帶以至山東水災尤甚至
蘇松地方則又亢旱車戽不及田禾焦枯臣聞至治
之世風不鳴條雨不破塊陰陽以正寒暑以時苟非
盛時則有愆陰伏陽淒風苦雨恭惟皇帝陛下宅心
中正律已謙恭聖德日新王化旁達是宜天心上格
休徵畢來而令也其應如此然災不虛生必由人召

竊恐陛下所以格天者容或尚有未盡必有所以致之故天以是示告必欲陛下之全盡乎臣聞皇者遇災則增修其道帝者遇災則增修其德王者遇災則增修其政蓋自古帝王雖已明聖無可瑕疵然其遇天變也未嘗敢謂不由己致益加脩省此其所以益明益聖天心慰悅轉災為祥伏願陛下以古帝王為師恪謹天災增脩德政求所未盡者而必盡之以仰塞天心則災變之弭可不旋踵矣臣以陋劣濫竽詞

垣雖曰文字之司實有獻納之寄輒敢效古人律賦
一通名曰修德應天賦仰塵睿覽謹隨本獻上千冒
天威無任惶悚待罪之至為此具本親齋謹具奏聞
天人甚邇感應孔明天心主於仁愛君道主於敬誠故
彼之所以示我者每急於幾之發見則吾之所以奉之
者當速於事之改更臣嘗上稽洪範庶徵之疇旁參漢
史五行之志知休咎之來也無端由善惡之感也則異
君道修於下則瑞為之臻人事失於此則變從而至雖

有參錯而不齊無非譴告之至意故惕然知懼者乃明
主之所為冥然不恤者乃庸君之所事臣請即今日庶
徵之應稽上天譴告之心維茲夏令之既畢正當秋令
之漸深其為氣也嚴凝而淒凜其為色也爽皚而晶熒
百穀為之結實萬寶相將告成而乃土泉濕蒸淫雨滂
沛蓋已涉乎夏秋亦幾易乎朔晦屏翳驕而轉肆羲和
鬱而潛退嗟后土之難乾乾憫禾頭之生穰溝塍滿溢
人生理以維艱墻壁頽穿客子宵興而不寐臣聞陰雨

為小人蒙蔽之象溫燠為人君寬大之恩故刑誅清肅
則候氣自正邪佞屏黜則陽德大明是其無感弗應誠
若響之隨聲恭惟皇帝陛下克敬克誠作肅作乂即聖
德之無疵固與天心而相契然而休徵未臻咎徵荐至
雖天意未可以測知在聖明豈宜其有是若云天之仁
愛告每急於幾微則考之當今亦或可言其一二臣敢
不避誅夷之罪用輸螻蟻之忠意者憚士容有在側而
遠佞之志漸以中阻元惡未即顯戮而討罪之律漸以

弗公忠諫未必從而聽言之意漸有所厯正論未即用而任賢之意漸有不終施恩未遑而政之措也與綸音而有異役民太濫而仁之著也與初時而不同至明容有所未燭下情容有所未通心之所主或有出於意見之私念之所加或有戾乎道義之正躬行之實或缺具文之美徒勝是皆不能悉純乎天故足以為感召之證若曰不係於斯則何為而有是應方今閭閻愁困於饑餓盜賊充斥於郊圻商賈被其劫掠官司不能撫綏方

值秋成之有望復遭霖雨而害之竊惟陛下德音屢布
固已切切於愛民視朝不違亦既拳拳於治理顧民隱
之若茲諒聖心之所注惟夫國是當斷而未斷善政當
舉而未舉旦夕無將順之人左右多阻尼之弊亦或似
乎蔽蒙亦或同乎怠豫且夫天之愛民也切則警之不
得不速君之奉天也恪則思之不可不周故不敢謂一
善已足以舉其槩恒恐一失皆足以致其尤臣嘗即感
應之顯明畧類象之拘泥休之應也恒艱其全答之感

也每見其易故屢事善矣而休徵未保其類從一事失焉而咎徵或得以錯至必若案圖而泥文是為慢天而自恕如曰此事得而此咎之應乃數之或然彼善盡而彼休之違非我之所致殊不知災之示下每苦於妨時則稽之於疇豈能以相值固當合之以省厥愆不可分之以求其類苟即外錯以為辭拒人言以自諱則人主終無警懼之時上天不白譴告之意所以漢儒穿鑿甚失箕疇之微旨是故善言天者必不拘其迹誠事天者

必當返其躬視上天庶徵之休咎悉由吾一氣之流通
恐懼修省秉誠心於淵默消伏感召達精意於昊穹留
神於萬幾之煩致勉乎五事之德事有所當舉斷之以
必行義有所當從主之以不惑用舍刑賞一毫不徇乎
私號令政教百事必責乎實究民隱而俾無壅蔽沛德
意而務無阻阨夫方其始也既有以拂人心而召乎灾
沴洎其定也即可以回天意而致乎祥禎蓋謹之又謹
德政既無所戾則以和召和休嘉自無不臻將見四時

正而品彙以育三光全而泰階以平四海戴之為聖主
萬世仰之為明君小臣至陋深懷葵藿之誠陛下至仁
不罪斐狂之士知土壤固無裨乎崇高諒滄溟豈獨辭
乎瑣細輒敢為古人聲律之文罄臣子責難之義蓋因
事獻納乃侍從之當然以文箴規類百工之執藝愚誠
必於盡披拙直初無所忌雖詞之謏謏視古作以獨慚
而意之區區較昔賢而無異惟仰鑒於淵衷庶少裨於
聖治

別知賦

何予心之無聊兮羌忽忽如有遺匪懷祿而靡釋兮乃
獨悵悵而弗怡予昔有志於泛愛兮謂傾蓋猶知心何
人心之險幽兮迨山高而海深繫自信而靡顧兮幾顛
踣而阨窮紛紛栩栩以相逐兮孰有能諒予之愚衷孔聖
所貴乎無悶兮在予心其何疚歲冉冉其不居兮恐媿
名之日仆嗟夫子之何謂兮曰予心之靡他予亦未敢
自謂其必然兮顧夫子之與我共勵志於進修兮勤相

予之不能羌窮探而力紹兮尚墜緒之大振指迷途以
並驅兮謂千古其一時追逸軌而莫及兮顧蹇鈍而已
疲窺末光於德鄰兮資輔仁之麗澤感夫子之巨誨兮
皦此心其如日謂因依以沒齒兮奉周旋以綢繆何此
會之弗可常兮邁欲別而莫留呼天龍而為駕兮逝蹇
裳而去茲邇長風以遐征兮指故山以為期掩衡門以
索居兮羌畢志乎初服奉教言之孔明兮期報君以不
辱念夫子之惻歎兮即欲去而盤桓出都門以悄悄兮

感雲龍而永嘆鳥孤飛而嗷嗷兮獸失羣而悲鳴伊物
類且有然兮顧若為乎予情亂曰春江兮水深春草兮
愁人靡靡兮長路望望兮雲岑渺懷人兮何極浩離思
兮難任倘不我兮遐遺時惠我兮徽音



文簡集卷八

欽定四庫全書

集部

文簡集卷

九至
十一

詳校官中書_臣葉元符

中書_臣劉源溥覆勘

總校官原任中允_臣王燕緒

校對官修撰_臣戴衢亨

謄錄監生_臣張鴻恕

欽定四庫全書

文簡集卷九

明 孫承恩 撰

賦

黃洲賦

太守崇仁吳侯以黃洲自號人惟知其以地
名故而未喻其志之芳潔也余為作賦曰
夫何一美人兮羌潔清而好修抱昭質與
姱節兮懷耿

介而靡儻裁朝霞以為衣兮綴明月而為裾服芳馨以
自珍兮意澹靜而自舒繫大江之西逝兮為巴山之故
區有地曰黃洲兮實美人之所居何巨浸之沆漭兮見
沃壤之恢恢鬱原隰之撫撫兮又羣山之四圍風氣宛
其萃止兮既清曠而又窈深何美人之自得兮寄超世
之遐心繚白雲以為垣兮接層波而為砌既滋蘭而樹
蕙兮又植荃而藝芷把瓊枝以自玩兮挹沆瀣以自娛
太和與遊兮澹泊為徒絙空桑之素絃兮亦陳編之是

理何太音之寥寥兮感千古而有以時扁舟以獨詣兮
尋白鷗之芳盟喜魚鳥之弗我猜兮羌馴擾而不驚採
蘋花以作脯兮汲清流以薦觴歌滄浪之遺歌兮詠兼
葭白露之章舉世汨汨於榮華兮嗟利區之擾擾顧趣
尚之靡同兮孰與玩此芳草軼埃壒而上征兮豈能溷
其冰襟思古人而莫見兮塞獨勞乎寸心夫豈傲世以
自異兮誠不忍易志而改度惟昭昭之未渝兮恐不及
前修之踵武皇有訓其孔灼兮睠大義之謂何維出處

之有異兮亦惟蹈素履而靡它秉此志之冲冲兮繫高
情之未衰及吾行之未遠兮緬故鄉而永懷人間富貴
真露電兮誠何足以把玩彼貿貿以沒齒兮豈直高人
之一粲惟人情之易溺兮紛此蔽之莫祛競自詫以為
能兮迺獨謂其為已迂塞余生之僻固兮仰潔芳而興
慕恐美人之我違兮倏歲月之云暮鼓余楫之旆旆兮
拂余袂之翩翩從美人於洲中兮聊優游以忘年

後黃洲賦

余旣賦黃洲頗見主人志操主人曰侈矣而
余之意則猶有未盡也再為賦曰

黃洲老仙寄遠興於雲天羌特立而寡和爰託號以自
宣客有問曰益聞居巖處穴者未覩乎通都蔽席隱茅
者未識乎大廈誠以溺近者不可言遠志小者難以語
大故神龍遭螭蛇之侮鵙鵙罹斥鷃之譏豈惟賦形之
有異亦乃為識之不齊吾不意以先生之軒豁博大而
顧為是之拘拘也渺茫瀛海厥有十洲維真仙之所居

咸翳鳳而駢蚪偉先生之絕塵眇八極而天遊歷汗漫
而無際叅翺翔而與儔何依依於故常睠茲土之淹留
堪輿有靈境名勝有遺跡繁焯異於人間非僂指而可
悉陟紫霞而仰文公之懿範聞赤辟而思周郎之奇勛
嗟桑落之千年邈爛船之幾春伍以胥傳蔡以瑁著名
鸚鵡者興志士之悲表琵琶者墮遷客之淚斯皆圖記
之攸載抑亦耳目之所詳豈若茲土之卑卑實吾聞之
未嘗吾意先生胸襟之空洞度量之淵永疊泰華兮千

尋吞雲夢兮萬頃何此洲之區區足以當先生之一哂也老仙曰吁子言已迂凡子所陳我曷敢居吾聞天下事貴其真名必以實若誕而誣乃道之賊故君子無溢美無侈情趣卑溺近者既余心之所鄙抗名傲世者亦余心之所憎維吳之先世居茲里繫死徙之弗遷睦宗族之萃止洲何名兮此黃土脈腴兮色中央田可耕兮水可湘庸詎謂兮非樂邦地以人而名勝在古今其固爾豈開闢之肇初即焯異其若此維茲土之雖隘樂民

風之孔淳地何能以美余顧顯之之在人且吾聞樂樂
自生禮不忘本苟茲義之有合又何必高譬而遠引嬰
世故而靡釋驚歲月之屢徂悵道路之阻修望白雲之
可呼撫倦遊之將歸永畢志乎初服庶敬恭兮不替瞻
桑梓兮在目不然則君子固將志在天下心存九州顧
予雖蹇滯而執迷誠亦何取於此洲言已客去老仙俯
几而歌曰黃之洲兮吾有廬蔽灌莽兮頰清漪緊阻越
兮誰與居江水來兮沒吾故扉吾有廬兮黃之洲衛不

祥兮神庀休繁阻越兮邈悠悠嗟猿鶴兮無怨尤羗歸
來兮弗久留

又後黃洲賦

余既兩賦黃洲辭雖陋劣而於先生之高情雅致自謂
頗得一二焉客有言曰子亦嘗究黃洲矣乎維黃洲故
有出相之識矣先生抱公輔之器實足當之子宜以是
為先生賦斯得其實而惜乎莫之及也且子言乃隱處
事非用世者之所宜也是雖蔓延多辭豈先生所嘉耶

余笑曰固哉斯言若是乎人之志趣之靡同也予試以先生為何如人也先生所存固非淺薄所能識然嘗侍其論議庶幾道德之士也志道德者功名不足以累其心而乃區區以爵位言不亦為先生瀆哉即如子言吾恐先生之不悅也滋甚客曰雖然試為賦之余曰唯唯紛吾行而遠遊兮眇浩蕩其焉往遵大江而西邁兮得崇仁之奧壤弭節南阜之野醺酒樂巴之祠勘紫玄之幽幽躋芙蓉之巍巍庶幾猶有所謂神仙者乎有緒淵

然有洲突然民居若屯棟接薨連而復有石梁當震之
隅揖父老問曰此非秦皇帝之所驅者耶胡為乎其在
茲也父老曰嘻子言毋易厥惟有靈吾為子語嘗聞古
老相傳是橋興則地出名相稽之往昔屢有徵矣地靈
人傑厥祥呈矣名勝相望馳休聲矣盛衰迭尋幾廢興
矣茲惟其時際盛明矣且子獨不覩乎巍巍重重隱隱
隆隆長鯨臥波修霓橫空彼其破渾茫凌空濶紛魚龍
之驚奔委波濤之寧帖地祇獻績川后効能啟大壯之

自天匪綿力之係人吾意當有賢者出建功策勲以際
昌辰乎余駭曰有是哉是氣數然歟抑風水之說然歟
抑事有偶逢而適遇者歟吾聞天地之運有開必先故
社鳴而賢人生河清而聖人出亦彰彰矣推之於此其
理固有相類者歟然若所謂屢有徵者余實未喻敢請
其畧以廓蒙蔽父老曰是更僕不可盡也姑語子以其
尤者宋有晏殊氏剛峻且文好賢愛士為時名臣偉哉
荆公道擬經濟比迹伊周志三代治有羅點氏學優行

恭淳熙之間踐華陟崇是或遠在一郡近見一邑固孚
靈之自茲乃屆期而一出者也嗚呼噫嘻是則然矣然
吾所惑者語多傳疑事或傳會今之不能逮古猶面之
不能及背橋之於人其時世之先後或相馳而或相值
古老既無所傳簡策亦無所記乃臆度其必然則若之
見固無異即夢以為真而余之問亦何殊按圖而索驥
也於是父老默無以對余亦思之弗得神倦就寐夢一
丈夫變幻晦冥緇衣玄冠有偉其形呼余言曰余黃洲

之神也維茲地兆生賢久矣然氣之盛也不數而賢之
生也實艱所謂名世者甚靳靳也而彼之所述又何其
卑耶就而論之莫若王氏之盛然以學術亂天下為宋
室禍則其相業何如也而謂茲地鍾靈毓秀在於是不
亦重辱哉且君子亦惟求其實何如耳不惟其實而區
區以位言則陋矣子亦不聞耶有元中葉嘗出一人矣
曰吳草廬氏實以儒者之正學為孔孟之的嗣其名位
雖非晏王之倫而其德業則固伊周之類矣自後寥寥

且二百餘年若甚惜而固秘者久蓄之餘今又發於其
裔矣而獨不知耶子亦盍於其人論其所存而要其所
至苟有至焉則猶足以驗昔言而重茲邦婉前修而益
聖世而乃拘拘於往者之究不甚泥哉余載拜謝教曰
噫嘻是矣彼有頎然而長志端而神昌挺然而介剛好
修而潔芳郁乎其文章以黃洲自號者非其人耶神顧
而笑余亦驚覺爰筆以記嗚呼異哉

冬菴賦

潤城之南。臘臘芳甸。萬子結廬。而冬菴是扁。客有問者。曰。四時運行。歲功以成。暄寒異候。係人戚欣。先生何居。而菴以冬名。意者厭暄喜寒。茲為異於人耶。萬子曰。達人大觀。何欣何戚。若茲之云。未覩其曠。子其不知。請觀之。易客曰。若是則廣矣。備矣。遠矣。邃矣。精取義矣。難測議矣。賤子不敏。請繹其似。夫何茲室之幽邃兮。既便娟而又窈深。天地肅其淒凜兮。庭戶閒其無人。余潔清以姱美兮。羌退伏而獨處。泊乎與泰初而無隣兮。蹇逍遙

而容與袖凍手於風簷兮撚疎髭於霜晨索美人以共
笑兮對白雪而孤吟誦羲父之遺經兮究乾坤之奧理
覩萬物之收藏兮感吾心而有以謝繁華於搖落兮羌
結實以歸根繫貞固而弗渝兮於以得夫性命之真守
一靜於羣紛兮存一誠於衆偽仰先哲之明訓兮聊優
游以卒歲

弔岳武穆賦

愧余生之后古之人兮撫遺事而傷咨弔英雄於既往

兮惟將軍之尤悲昔宋德之既否兮值強敵之跳梁嗟
世主之庸惑兮矧相臣之弗臧臣不有其君兮子亦不
有其父恐戴天之大仇兮肆安居而弗顧彼廟堂之何
心兮何將軍之獨勤揔畢力以報國兮身百戰之經營
戰郾城而大捷兮信軍聲之破竹震羶裘而褫魄兮宛
恢復之在目厄讒邪之抑制兮奉君命以班師凜擅留
之不可兮功垂成而就墮仰蒼天而慟哭兮天無耳而
不聞悲靈修之莫余知兮欲控訴而無門驥望長途而

欲騁兮迺烹之于中路豪鷹側目於清霄兮條籠絜而
甚固日曖曖而西翥兮時靡靡而過中嗟英雄之一死
兮慨機會之不可以再逢雖天意之或然兮亦將軍之
咎也豈不聞將在軍兮君命有所不受也堅前志而弗
移兮羌有進而無退也權輕重以處之兮寧自受夫不
諱也宣至誠以自奮兮仗大義而長驅伸皇威於雷震
兮掃幕南而空之搥厥黃龍兮井湮而木刊雪九廟之
仇恥兮見司隸之衣冠挈故物以盡復兮報明明之天

子歸伏闕以銜哀兮瀝血誠而祈死顧偉節之如斯兮
或君恩之所寬也縱罹辜而受戮兮亦將軍之所甘也
委薄軀以効主兮迺將軍之素心知吾事之既畢兮何
一死之足云舒神人之痛憤兮留英烈於萬世羌雖死
其猶生兮可含笑而入地理固有用權以濟事兮迺君
子之所多胡効小順以自阻兮致大功之蹉跎彼狂蠱
之弗思兮固不暇夫深責吾獨惜夫將軍兮抱遺憾而
不釋訪孤墳於湖濱兮渺幽懷之綿綿紆情辭而一弔

兮酌宿草之寒烟羌英爽兮知不知謂余言兮然匪然
後別知賦

夫何天日之淒厲兮歲忽屆此凜冬玄雲泝泝以布護
兮原野間其多風舟人告余以吉日兮翩余袂乎吾將
逝懷冰蘖以為羞兮雜申椒以為糝歲昔甲戌之南驚
兮指故山以欣欣懷友生而戀戀兮尚悽惻而弗禁矧
茲與二三子之濶違兮復背鄉而去邑顧余情之若為
兮獨寔寔其莫釋吁嗟末世之溷濁兮競佻獮以自賢

猖冶妖之淫狐兮子都掩抑而弗妍塞余生之顓顓兮
抱迂拙而不知去莫或諒余之獲落兮惟二三子之我
與沕淵潛以僻處兮寄遐情於逝波安淡泊而靡余厭
兮同衡門之詠歌羌窮居之足娛兮余將終此而無悔
何前瞻而後顧兮觸余心而多慨紛總總其憂集兮余
豈樂為此故也曠慈闈之晨昏兮恐而不能措也昔余
有志於千古兮指前修以作則屯中道而遭迴兮恐令
名之不植曰不仕無義兮懷依依而靡寧苟抱質以勉

進兮或將來之有明余既採杜蘅以充幃兮又薜荔之
盈牕將以遺夫美人兮致情悽以永結女嬃要余以慎
重兮盍從巫咸而訊之巫咸陟而靡降兮世悵悵而誰
稽余令猿鶴以共策兮猿鶴告余以不可曰時俗之迫
阨兮顧茲行之或左抱余迂拙以自試兮恐枘鑿之宜
然子誠欲丐夫濟兮思利方以為圓余詎不諒茲兮羌
微衷之故在余誠鄙庸而靡似兮恐以祿位而自械信
吾志以無疑兮依前修以節中置得失於自然兮詎嬖

姺以為容余兢惕而慚慙兮惟淺薄之靡濟紛羣龍之
滿朝兮顧顛顛之何恃鑄柔鉛以為劍兮束葭葦以為
楹不審已以自度兮將顛殞而莫任道貴黽勉兮余其
敢摧顏而自畫砥終不可使為瑄兮俟顛殞其奚益吾
與猿鶴共要兮泊松菊使為盟曰吾行之不遠兮保姱
節以堅貞繫二三子之共鑒兮諒斯言之靡措叅追逐
以無由兮獨臨風而延佇亂曰維吾行兮合散固無常
期與子別兮又何歎息而增歎歲忽忽其邁盡兮恐流

光之弗居其各崇爾德兮庶以究將來之所基

留都翰林六植賦

六植賦賦六植也賦栢賦桂賦竹賦桐賦槐
賦桑院中之植不特六六者植之美也余來
攝篆既五閱月人事之酬酢已稀又無簿書
之煩長日暇甚覽物觸興各得短賦一首雖
辭旨淺拙無裨於理道然視博奕不無猶賢
抑託物比類風人之義所不廢焉輒存之以

貽同志且備院中故事云

雙栢

夫何雙栢之夭矯兮羌不知植之歲年匪移根於新甫
兮則分種於岱嶽之巔當詞林之清切兮亦致身之得
地繁盤踞之高爽兮寧羨夫秦封之貴挺長材兮既瑰
奇森秀葉兮又紛披結珊瑚而綴寶瑩琥珀而流脂承
日華於清曙兮接雲氣於中天浮沆瀣之湛湛兮沐靈
雨之涓涓迸孤根兮金石摧鬱老幹兮排風雷恍雙虬

之蜿蜒兮當白晝而不垂固造化之鍾秀兮有神祇之
護翊殿羣植以後凋兮壓衆卉而莫匹彼其貞氣毅色
似諍臣拂士懷蹇諤而無阿柔也高標雅操似幽人介
士之貞潔而靡求也傲歷冰霜似蘇屬國之抗節威武
莫得而屈辱脫落天妍似孤竹君之制行而不可浼以
塵俗若其凝重端莊者又似夫偉人元夫拱立正視而
威儀之嚴肅也挹衆美以凝德兮獨仰止而斂衽乘一
氣之深培兮閱千秋而無盡守玄穆以靜處兮抱貞素

而靡渝養材具以大成兮將為明時之所需

雙桂

曰此有雙桂兮本幽谷之靈根抱風霜之雅潔兮稟乾坤之清芬羌移植之何時兮臨玉署之軒墀曾敷榮之幾見兮遽荒穢而莫治有瓦礫之磽确兮又蔓草之糾纏根拳曲以弗舒兮色慘頽以弗妍無條柯之掩靄兮又何密葉之蒙翳雜果羸蠹蛸以並居兮鳥雀過而弗視肆棄置以弗惜兮將生理之日戕乃摧薪之弗遠兮

又何秀發之可望叶日余見之而悲兮嗟爾生之何瘁
也豈爾材之固然兮乃遏抑爾誠亦何以自遂也斂英
華而莫見兮抱閤閣以終年顧異質之何有兮謝桃李
之嫣然命僕夫以從事兮揮錢鏹以芟夷屏瓦礫與蔓
草兮畚豐壤以厚培汲清泉以日沃兮水土浹而流膏
日欣欣以改色兮似謝余以幸遭繁雨露之旁施兮乃
承藉之有也發天香與秀色兮余誠為爾冀也維摧
殘則易兮而長養之孔艱吾亦詎能為爾必兮顧余力

之既殫嗟物理之有亨屯兮豈獨爾植之為然思夫天
人之際兮感余心而永歎

叢竹

維此亭側有叢竹兮貞幹扶疎挺蒼玉兮濃陰蒙茸團
繁綠兮夕蔭明月影朝旭兮凝霏沍露如膏沐兮涼飈
徐來聲簌簌兮滌除塵氛解鬱燠兮泠然中襟清可掬
兮不如凡葩紛郁兮維此勁堅抱貞肅兮歲寒靡凋
異羣木兮日暮佳人倚空谷兮閤然潔修豈不爾淑兮

人亦有言療士俗兮詎必渭川茲豈不足兮有懷王猷
先得所欲兮我時亭中坐幽獨兮顧瞻猗猗醒心目兮
言念君子詠淇澳兮比德匪玩尚自勗兮

孤桐

有桐特生兮墻之陰既修直兮又鬱森敷濃陰而四垂
兮聳喬柯之幾尋墻之陰兮窅而僻翳蓬蒿兮填瓦礫
塵坳積以四塞兮又孤鼠之衝斥嗟嗟爾桐之何為兮
乃生於茲地也難擗柳與樗櫟兮爾豈若是類也后皇

錫爾以良質兮既材且珍充虞廷之貢兮備韶樂之瑟
琴匪託根於蒼厓兮則擢秀於玄溪映朝陽之皦皦兮
實鸞鳳之攸棲物與地而兩稱兮顧造物之所私嗟嗟
乎爾桐兮何獨偃蹇而在茲豈玄化之莫憑兮信物理
之乖舛嗟嗟爾桐之虛生兮辜厥美於弗顯王之堂兮
虛以敝有崇臺兮華蕭爽風日清美兮塵囂靡侵是惟
宜爾處兮藉土脉之厚深吾欲徙爾以植茲兮顧人力
有不任吾誠莫為之所兮徒仰睇而沉吟

獨槐

爰有嘉木虛星之精柔條春敷密葉夏榮挺扶疎以獨
秀乃孤蹇而無朋未緣結根於文陛亦既聳望於詞林
冉冉猗猗鬱鬱亭亭驚兔目之初見又鼠耳之條更嚴
翠幄之高張訝碧雲之久疑無延袤之庇畝亦婆娑之
蔭庭被朝烟以輶暝漏夕陽之微明來闌闌之鳥語隱
嘒嘒之蟬聲青蟲並懸而吐絲赤螳緣柯而漫行韻涼
颼於清晝祛熱毒於炎蒸鑽燧時而致用守宮誕而莫

徵我有幽軒
斐几潔清時
來燕居神舒
志寧撫嘉植
以流憩亦商
歌而獨行無
取士師之聽
訟思得友生
以談經玩金
葩之毯毯攬
瑤實之青青
繫物生之何
知關人事之
多情彼有感
時序而驚進
取吾將勤服
食以制頽齡

兩桑

有猗者桑
彼牆阿託根
得地鬱婀娜
雨濡露澤發
生茂卑身蔓
條陰庇覆南
風吹葉沃若
綴玄樔兮又
鮮渥

供黷事兮絃琴瑟嗟茲二用惟汝德弗余微眇倘有取
畢身殫才為君許

文簡集卷九

欽定四庫全書

文簡集卷十

明 孫承恩 撰

賦

南征賦

惟皇明之十葉兮新天子膺寶曆以龍飛明德光乎列
聖兮鴻恩暢乎九圍緬彼交趾寶惟炎荒遵王靈於一
統謹職貢於殊疆繫兼圉而並育兮溥皇仁於一視降

綸綍以寵錫兮乃詢謀而選使媿薄劣之無似兮托近侍於闕庭何承之以冒濫兮奉渙命而凌兢歲敦牂之仲秋兮爰發輶而云邁奄萬里以孤征兮指雲山而慷慨吾斥蜚廉以先驅兮令屏翳以洒塗結彩蜺以為纓兮樹青鸞以為輿冠切雲之岌岌兮佩璫珎之鏘鏘擁雄劍以激烈兮心灼爍而四揚泛浩渺兮越阻深走陂陀兮壁崎嶇天風肅其滕余兮又時暘之赫臨豈神監之在茲兮顧佑勤而斐忱涉歷乎江山之大兮周流乎

宇宙之半廊耳目之菟瑱兮蓋於是而得乎大觀弔往
括之遺跡兮覽前代之故墟時嬰心以激烈兮亦感歎
而歔歔過都邑以歷覽兮每觀風而問俗余誠不及古
人兮歌皇華以自恧心搖搖其靡定兮念前途之邈悠
羲娥倏其淪代兮悲節序之弗留天慘慘其無色兮雲
黯黯其欲雨觀草木之搖落兮驚歲華之云暮玄猿蒼
兕紛其成羣兮鼉鼉向余以嘯號荆榛鬱其眯目兮閒
原野之蕭條冒寒霏以晨驚兮戴明星而宵馳余豈不

知自愛兮顧王事之靡稽
蔑倒景兮御長風乘玄冥兮
逝鴻濛廓蕩蕩其無際兮
乃今見乎寰中驚使節之煒
煌兮謂自天而下墜覩遠人
之駿奔兮見王化之無外
天莽莽以無極兮路行行而
未適忽吾及夫南徼兮暫
弭節乎此州睠土俗之遐絕
兮亂山莽其糾紛瞻斗柄
於直北兮恍羲馭之可捫
夕惕若以自厲兮懷冰蘖以
彌堅諒中情之端潔兮何非
妄之能干惟使事之靡易
兮矧馳驅於絕域羌海立以
山動兮冀增光於上國懷

先哲之令儀兮豈薄劣之所任覽典籍之攸載兮固有
槩於余心偉子卿之大節兮仰士燮之清風傳却姬以
自潔兮陳諭夷以致從曰臣職之固然兮尚黽勉以為
則繫茲行之多違兮睠遠道之孔棘紛訛言之屢變兮
傳交中事
多不同者羌欲信而莫憑淹茲留以涉旬兮使余心之
忤忤繫犬馬之戀主兮望君門於九天曠慈闈之定省
兮仰托意於穹玄顧王事之靡盬兮尚言歸之未涯睇
行雲以長嘯兮臨北風而興嗟念去國以萬里兮神恍

恍而弗寧渺不知吾身之在茲兮心忽忽而自驚坐白
日以成痼兮蹤履起而彷徨夜迢迢而弗寐兮獨展轉
而達明叶辭曰堯封浩蕩極坤輿兮聖德含洪溥涵濡
兮有懷永兢臣職供兮靡嗟于役効匪躬兮顧茲多艱
憂心忡兮懷忠履信惟我師兮抱此以往復何疑兮

北歸賦

月孟陬以日吉兮反南旌以言旋振余袂之輕矯兮浩
歸興之翩翩遵故道以云邁兮鼓桂楫於中流指亂山

以北驚兮歷川原之悠悠羌久客以鬱陶兮乃茲辰而
暫怡路匪縮而若近兮情與境而俱夷於時靈雨浥塵
條風布暖烟霏霏而漸薄日曖曖而猶短水樹澹其鮮
新兮雲霞爛以輝映對景物之熙明兮得魚鳥之飛泳
春水兮綠波春草兮靡蕪村村之桑麻響山之鷓鴣
呼天風於蘋末兮掛高帆之百尺何歸心之飄揚兮
與飛鳥而競疾嶺之北兮江之東覽揚俗兮觀浙風瞻
帝都於日下指吳會於雲中陟奇勝而靡暇兮空引領

以寄情之登高之藻思兮媿往來之虛經豈賞心之故
違兮實王命之多懼懷兢惕而靡寧兮何能為此暇豫
仰子長而莫企兮又使職之曠鰥惟裔荒之頗歷兮覩
民生之孔艱覽天宇之浩大兮湯萍梗之如寄興千古
之遐思兮悲百年之身世惟人情之戀土兮在窮達而
則均矧岬岵之眷懷兮紛百感之萃心緬故園之芳菲
兮喜歸歟之及辰亟吾行之弗緩兮慰慈親之倚門

榮壽瞻思賦

讀書而仕仕而得天子褒榮其親人子之至
願也至樂也而惜也父則逝矣不及見矣人
子之至恨也至痛也而幸也猶有母氏之在
也於是黯然而傷躍然而喜悲弗及矣喜何
能已嗟嗟陳子吾為子悲而復為子慶也乃
述其意作榮壽瞻思之賦賦曰

邈吾宗之邈悠兮或鼻祖於黃虞仰先德之代有兮服
古訓而為儒憫余生之既晚兮固寡昧與顓蒙曰未有

知識兮承鞠訓於慈宮昔余嚴親之好修兮躬一節以
清真亶一鄉之善士兮甘約處於衡門更母氏之聖善
兮既柔慧而貞睦相夫子以造家兮實儉勤以自勗余
既詩禮之有聞兮又母教之篤至服非惠而匪躬兮佩
非善而罔繫何日月之弗居兮靈椿條其早凋叩辜愆
而無所兮何地厚而天高幸慈闈之無恙兮奉脩瀝於
晨夕亦既黽勉而自奮兮乃策名於仕藉守官歲以罔
懈兮擔一念之兢兢並休烈於俊髦兮藉天地之寵靈

洪恩湛以汪濊兮辱封章之俯及騰雙龍之糾纏兮燦
五雲之烜赫王言鄭重以褒嘉兮發潛德之幽光階清
朝之一命兮殆百世而流芳乃母氏之徽猷兮亦昭灼
於里閭封稱懿其顯貴兮有章服之炳煥岌龍冠之燦
燦兮霞帔爛其檐檐藹庭闈之溢喜兮動高年之色歡
盼萊彩以欣欣兮心為之悅懌獨悲夫嚴親之弗見兮
不覺涕泗之橫臆彼具慶寧非願兮顧人事之靡齊也
不有慈聞之康豫兮曷慰夫寸草之私也紓孝誠以莫

寓兮恒祝願於昊蒼萃胡福於母身兮享眉壽以無疆
維堂構之既崇兮門閥倍其有耀嚴親而有知兮亦九
原而含笑繫存沒之均沾兮儼焉媿此眇躬圖報稱之
無能兮永畢力乎臣忠系曰國有令典善斯錫兮勸孝
勸忠自古昔兮有美陳子克舉職兮封章自天爛生色
兮陳子拜稽抱兢惕兮感念存沒悲喜集兮區區愛日
無終極兮天鑒純孝佑誠惻兮怡怡高堂福履益兮曾
玄鼎來紛繞膝兮我謂陳子心靡斁兮孝思維嘉人爾

則兮

感蟋蟀賦

庚寅秋七月既望夜寢書齋聞蟋蟀之聲驚
節序之迅速念德業之蹉跎感而作賦曰

當清夜之迢迢兮窅天宇之沉沉何啾啾以唧唧兮亂
寒蛩之悲吟時則銀河在天玉露如洗澹月流輝涼飈
不起爾乃空堵暗壁幽幽閒庭非公非私自止自鳴何
悲而泣何怨而訴其舒徐也何思其淒惻也何慕或獨

唱而無偶或相和而同聲或語短而屢變或永言而數
更或更端而方濃或終章而輒停或闌珊而欲歇或羞
澁而弗勝或沉思而未縱或得趣而自矜孰好汝而為
娛孰叩汝而故荅孰誘汝而弗知孰督汝而靡輟孰假
汝以音聲之妙孰授汝以疾徐之節以時而有顯晦何
感而為語默豈新愁之旋增聊舊恨之未減溷一類而
自分引百變而弗雜羌何物之善鳴兮齊萬籟於一吹
余時幽夢既闌宿酒全醒却慮屏思側耳靜聽如窶人

貧女之出其無聊如放臣去婦之吐其不平如感風木
者極終天之恨如羈逆旅者切懷土之情如鼓盆者強
歌而終悲如慰別者當喜而翻歎如過故都者興黍離
之歎噓如念行役者極中宵之淒惋如抱沉疴如懷隱
憂如登山臨水送將歸者意戀戀而莫釋如辭家遠役
顧嬾子者語刺刺而弗休虞姬請劍而吞聲韓娥當筵
而斂態懷湘靈之淒清動雍門之感慨腸斷山陽之笛
魂銷薤露之聲寄慟哭於絕塞寓哀怨於胡庭非宮非

徵不律不呂疏數弗齊音節自會爾其乘氣機之感觸
兮任天倪而呻吟雖知生之云晚猶喜鳴之及辰昔摧
藏而未逢久泯默其如結抱終歲之窮愁欲於茲而盡
泄極抽思而弗竟愈出奇而莫窮何情事之如許兮而
貌軀之能容既歷歷以分明亦切切而覩縷恍依床而
近榻兮似向余而訴與感余心以掩抑兮增百年之煩
憂方自念之弗暇兮顧何能為汝謀嗟乎盛時不常流
光易換念余生之幾何已百年之強半悲沈腰之漸怯

驚潘鬢之條變媿德業之無成將與草木而同貫矧茲
感物而摧傷置此心於冰炭抱耿耿而莫語答悲韻而
永歎歌孤枕而弗安獨惺惺而達旦

東石賦

郡伯晉江黃侯別號東石余惟石有貞固之
義而東者震之隅說文東動也陽氣動也
有生物之仁焉侯之德以之余欽侯之為
人也為作賦曰

猗茲石之崛起兮屹然嶸立乎天東既巉岩以砢礧兮
又崦岈而穹窿羌憑藉之靡階兮又附麗之無窮挾光
晷以直上兮超埃壒而接渾茫鍾造化之神秀兮稟乾
坤之純精烟霞滋其色澤兮雨露濯其光晶揭泰清以
貞觀兮並萬象以森羅當蒼龍之大矯兮走東西之叢
娥資乾德以堅貞兮秉少陽之發育洩和煦於至靜兮
盎生意之鬱勃蔭若木之華滋兮映扶桑之朝暾海色
蕩以滢漾兮瑞氣靄其氤氲表形勝於四極兮擅秀色

於千岩何盤踞之凝重兮見巖巖之具瞻拔孤標而倚
日兮儼一柱以擎天亶神明之扶翊兮類化工之雕鐫
頰萬有之鬼瑱兮凜氣澤之高深通地脈於嵩岱兮又
繇絡乎崑崙出膚寸以為霖兮沛甘澤於八埏斂玄功
於靜默兮永獨立乎乾坤重曰維石之懿古所述兮易
艮取象又介特兮禹貢怪石充庭實兮隕宋維異紀聖
筆兮降是日繁紛載籍兮誕妄乖離孰辨質兮平泉萃
奇厥志溺兮達人大觀等戲劇兮豈如茲石具法式兮

卓立雄峙表正直兮義貞仁澤乃全德兮靜壽固然垂
無極兮

水竹居賦

友人朱君朝和別號水竹蓋以居之所有也
而其寓志之雅潔亦因是以見焉聊與短
賦曰

緊若人之卜築兮爰擇勝乎江鄉川原迺其迴合兮何
窈深而鬱蒼既清流之湜湜兮有蕭疎之新篁暉繁陰

於堦圯兮浮澹爽於軒窓鳴禽紛其下上兮烟雲浩其
縱橫移風月於渭曲兮分幽致於瀟湘若人洵其好修
兮羌信美而潔芳既員通而靡滯兮又清節之介剛謝
塵喧以不染兮託意興而徜徉玩道體於鳶魚兮歌濯
纓於滄浪蓋將希踪乎淇澳而嗤彼嵇阮之徒蔑禮法
以為狂者耶

平田賦

咸寧管子號平田蓋取古人治心之喻心之

本然無弗平也而人故弗平之嗚呼生民
之所以相攘相攫君子喪道敗義小人殞
身覆族甚之屠爛糜滅而禍及天下者厥
亦何故哉夫平為恕為公為克己為安義
命於道也幾矣吾竊有感於管子之志也
故賦之

維天於穆兮大道孔夷降衷於人兮靡有偏陂

叶皮淳風

既漓兮人心昧其當然作意以好惡兮任小智以自賢

矯亢為高兮怪僻為異
顛顛以自詫兮而弗知於道之
離斯其賢智者之過兮
狙氣習而莫之移也矧彼世俗
之工巧兮又吾心之所悲也
習狙詐以為能兮繫方寸
之險巇有戈矛與荆棘兮
城府深而莫窺起波濤於平
陸兮設機穽於堂坳
重溟九泉匪遽兮
曾城茂業而匪
高紛擾擾以馳驚兮
擠越人而弗顧
羌是已以非人兮
逞私心而嫉妒
彼故為是之崎嶇兮
吾惟見其弊弊也
彼張弓者之何為兮
亦徒自取夫困瘁也
嗟嗟管子獨

何為兮與世俗而背馳志澹靜以寬舒兮履坦坦而無
疑付行藏於自然兮曾無所容吾情吾惟於道是勉兮
遑於世俗而重輕下者吾弗之陵兮上者吾弗之援吾
惟安吾義命兮誠不知夫人之愆立人達人兮聖有訓
其具在揆人心其曷異兮吾能獨高舉而遠邁仰天明
之莫測兮曾何較計之私顧平平之康莊兮信吾步而
安之嗟嗟管子之取是兮其會道之最也我維時繹兮
見義之大也天弗平兮天柱以崩地弗平兮地維以傾

寒暑弗平兮歲功曷成日月弗平兮晝夜弗貞人心匪
平兮亦苟免而幸生徑嶢峩兮敗興輻水湍急兮舟則
覆置器弗平兮器歎以戕措足於平兮免蹶而傷人心
弗平兮斯速咎而召殃巉岩絕壁兮勢則易窮長原廣
漠兮曠乎四達而靡弗通峻流激湍兮不逾數里大川
巨浸兮汪洋渺瀰而曷可以計嗟嗟管子兮久大之業
吾又烏能測其際也亂曰原田膺膺嘉穀植兮心維田
矣萬善出兮田焉弗治平稂莠生兮心維然矣邪慝興

兮聖人之田平復平兮以概斯民天下寧兮嗟嗟管子
視以為正兮

嘉嶺賦

陝之延安有嘉嶺山侍御董子之居在焉因
以為號按志地有范文正公遺蹟董子以
名法從異時勛業未可量蓋有志於慕范
者余賢其人重其地作短賦贈之

粵古雍之奧區兮華坤輿之秀靈運游衍於無門兮突

頽洞而上征緬地勢之雄偉兮環四塞以為城緊神明
之攸啟兮豈人力之經營考分野以正墟兮映井宿之
亭亭既欽崎以岵岵兮亦紆迴而窈冥聳形勝以峻絕
兮壓羣山而罕京抗清涼而枕重霞兮挾五龍以為隣
森梗楠杞梓之紛敷兮蘊百寶之光晶匪神靈之窟宅
兮胡氤氲之是凝將造化之特厚兮肆天作而地成仰
忠賢於異代兮曾茲地之是經揮掾筆以表誌兮肇錫
之以嘉名慨今昔於一瞬兮謂往轍其可尋

春岡書屋賦

猗茲岡之特起兮實聯絡乎嵩山既恢衍而博大兮又
逶迤而屈蟠繫土脈之美厚兮迓春至而流膏青陽時
以鬯達兮發草木之大喬有斐劉子結屋其下因世德
以爰居亦靈淑之攸藉揭辛夷以為棹兮斲挂檀以為
楣床有魏公之笏架揀鄴侯之書條風扇其几席兮瑞
靄襲乎軒窓紛百草之英郁兮又松檜之鬱蒼玩遊鱗
兮水曲睇飛雲兮林麓映隆隆之朝曦聽呦呦之鳴鹿

感太和之埶圯兮覽品彙之芳葩仰天宇之浩浩兮同
萬物而欣欣詠舞雩之高風修蘭亭之禊事效尋芳於
晦翁追行樂於伯子愛友良朋時同晤歌怡適琴書披
歷烟蘿究岡名之以春兮共敷繹其奧理惟草木烟雲
之華澤兮乃何談之易易曰春為天地生物之心在天
為元兮在人為仁首四序以發育兮冠四德以真醇固
君子體之以長人兮託茲名以寓意不然則岡何釋於
三時兮而獨於春是取劉子大雅盛德在躬涵一腔之

和粹決一氣而冲融登陟廟堂柄用斯及弘沛厥施康
濟民物贊陶冶於大化助橐籥於洪鈞蓋仁風與和德
極布濩而氤氲蓋將彌九州溥六合物無疵癘民豈夭
札溥春生於不匱移化日以舒長息澆風之慘慄復太
古之醇龐茲其所謂春岡耶

又春岡賦

有崇者岡厥壤沃兮維晉有山遼以邈兮太和融結互
磅礴兮逶迤陂陀相聯絡兮鍾靈華秀盛發育兮東皇

按律惠孔渥兮生意坎圯澤滲漉兮一氣氤氲鎮常續
兮如彼化國候烜燠兮草色花香澹氛郁兮劉子結廬
枕厥麓兮棐几明淨窅深穆兮有圖有書森萬軸兮于
焉起處養靜篤兮于焉藏修達靈淑兮飲和葆真仁以
為服兮后皇嘉惠大僚陟兮典司邦禁明勅罰兮義以
仁出擴愛術兮煦嘔斯民化玄默兮聿昭淳風侈元德
兮茲岡之名頌無斁兮

弔屈原賦

汨汨羅而訪古兮得屈大夫之遺跡
艤扁舟而敬唁兮撫往事而仰孤忠
惟君臣相合之不偶兮明良不可以
俸會而苟逢嗟嗟大夫生不辰兮值
世道之阨窮夷跼不可以共事兮梟
鷲不可以並榮嗟嗟大夫睥睨羣小
之滿朝兮又安望夫從容進說而君
從諗信信于羣沸兮曾不余心之諒
也顧君心亦不察兮余將曷為之仗
也徒戀祿以苟安兮將為君子之所
讓也姑去位以遠羣惡兮汨湘潭於
長放也顧江流之浩渺兮愿下為蛟

龍之蠶食實余心之自取兮非夫人之我逼余將以愧
夫羣小兮又冀夫君心之察識或悔悟而改圖兮庶邦
國之少益拂絕先王之祀兮豈非余心之所厭也顧余
自靖之為大兮何眇躬之足憐也我寧九死而不易兮
羌秉一性之貞堅也將叩河伯之深宮兮抑附馮夷導
已於上征歷九疑以見重華兮訴余心以自明後死者
千餘年論大夫者孰得大夫之微衷彼賈柳二子猶未
罄厥義兮又何罪乎美新之揚雄善乎紫陽氏之論也

人孰無過大夫乃忠之過人患無忠大夫乃過於忠是
誠議擬之允迪兮合人心之所同吾悠悠以遺論兮將
質大夫以自通行藏出處貴惟時兮乃以數諫而致君
恩之弗終思聖人之遺訓兮揭吾道之大中顧大夫之
獨行兮似有戾於中庸嗟嗟大夫叩九關於萬里兮將
無致忠之失所也沉眇軀於千仞兮將無為忠之稔禍
也大夫豈不自審兮曰自視之弗頗懷瑜握瑾以好修
兮曾不忍混濁世以自污顧此身之皎皎兮濯江波之

沅沅凜一死之決裂兮將御正氣以為神顧彼後君而
忘國兮誠蠱豸與螺蜃立世道之大防兮昭日月而等
乾坤慙末學之何嗜兮肆臆說而咕咕冀余心之一白
兮附公案之一番誦離騷於九歌九辯兮委詞章之貫
古留規矩於天壤兮紛後來者之踵武藉餘膏與賸馥
兮或亦及門而窺戶仰大夫已積年歲兮曾不得少伸
余之寸忱承嘉會以道經兮致瓣香展拜於江潯懷大
夫而不忍去兮顧余心之侘傺撫長途之悠悠兮尚徘徊

徊而延佇舒長嘯以孤騫兮邈遐思於煙水

月明千里故人來賦

有美一人天一方兮自我與別歷星霜兮邈焉阻違若
參商兮思之不見懷孔傷兮念厥契誼無時忘兮欲往
從之陸無車馳川無航兮縮地無術心傍徨兮今夕何
夕天宇蒼兮宛宛月出爛然光兮清輝溢出照徹茆堂
兮松菊蕭疎澹幽香兮琴書靜好銀燭煌兮有客行行
來何鄉兮從以兩僕挈囊箱兮山川迢迢涉津梁兮幽

居僻寂他靡嘗兮是余所思久相望兮天假其逢匪余
量兮應無念我特遠訪兮惠然其來示周行兮跋余引
領喜欲狂兮躡履承迎倒衣裳兮呼兒治具羅酒漿兮
野簌餽飮款壺觴兮傾倒別懷話故長兮我思古人有
范張兮雞黍為約言不爽兮子將無同意獨良兮抵足
共臥展衾牀兮夜如何其殊未央兮明河西斜影扶桑
兮雞既鳴矣東方明兮遲子未發且徜徉兮世事浮雲
沓茫茫兮執手相看魂飛揚兮後會未期淚浪浪兮古

言雲龍感衷腸兮安得如然同翱翔兮無苦惜別贈言
臧兮人生會合詎有常兮交誼固篤以道強兮胡為其
然歌慨慷兮金玉爾軀慎修藏兮各懋明德無怠荒兮

文簡集卷十

欽定四庫全書

文簡集卷十一

明 孫承恩 撰

詞

送侯少府詞三章

春陽兮載晴攬余轡兮郊垌紛髦覲兮歡迎羗鷄犬兮
弗震驚褰幃兮遠覽何極目兮多感閭閻寂寥兮野荒
蕪莫克賑汝兮將奈何

右東郭行春

有亭兮巽然弭余節兮停驂訊父老兮疾苦汝疾苦兮
余訴政曷為兮康汝殫余力兮汝處致汝兮樂生庶余
心兮以寧

右西郊問俗

有屋兮棠溪之濱侯至止兮茲蒞我民望棠陰兮戴侯
仁侯令去兮弗可留望棠陰兮我民憂侯茲陟兮羈上
國懷我侯兮再歌召伯

右棠陰遺愛

首陽操

夷齊二子伸大義於千載之上所謂特立獨
行以俟後聖者想其清風高致既無怨尤不
平之私而毅氣剛腸亦非有掩抑可憐之態
史遷之傳既無以知其心而世之所傳採薇
之歌又何其委靡而哀頌也豈好事者附託
之歟為擬首陽操一章

西山之岑兮上有薜薇我採以食兮足以療飢勛華不
作兮世道墮玄雲杳冥兮將何歸睠大義兮余其敢違
茫茫九州兮孰余知後聖作兮謂余是非吁嗟兮彼厲
階者其殆而

鐘石辭

古有石鐘今有鐘石石鐘以形用鐘石以神
用費子取以自號其旨微矣余雅辱費子愛
誼不可默作辭頌之

有隆者石湖之側兮卓立奠峙瞰深碧兮天與之資地
與質兮巉巖砢磈嚴正直兮上穹而圓下豐益兮我審
厥象孰彷彿兮有偉巨鏞竒雄特兮洪鈞索籥巧搏埴
兮元氣胚胎渾融液兮于鉦崇崇甬衡嶷嶷兮取象昭
昭筍簏秩秩兮雨沐露濡紛藻飾兮日精月華增色澤
兮傳世千古靡傾仄兮勿褻勿試神具敕兮含英蘊靈
杳沉默兮大音則希靜以為德兮障頽鎮浮有餘力兮
我觀萬有紛訛翁兮魚龍嘯悲風濤蕩激兮斂此羣賴

厚厥積兮鏗鉤維時振闔闢兮清廟明堂肆登陟兮發
揚天聲播無極兮

壽宋樗菴辭四章

大貝兮南金昔公之出兮望崇士林翩其歸來兮三泖
之潏九峯之岑

峯之岑兮泖之潏澹道遙兮自容與養高兮履素紛餘
鷺兮亦莫余侮

北山兮採芝南澗兮尋詩傲睨宇宙兮浮榮塵壒讀書

以娛兮不知歲月之云邁

有清其秋令節芳兮有叢者菊吐幽香兮登公堂兮舉
公觴兮伐鼓吹笙浩且昌兮祝公壽兮樂無疆兮

近田辭

近田者叅府靈寶許子別號也許子號近田
其志不專於田即田以見志耳為辭以闡之
且以致相發之義焉

惟道在人不遠伊邇求道於遠道則非是近義云何為

切為親隨處隨在目擊道存則匪汗漫則匪浮誇愈近
愈真愈遠愈差是故善學鞭辟近裡本之於身以達於
事即類取譬充義達為是謂一貫粗精顯微許子有田
近也匪逖惟志之占惟道之的許子恂恂本實是敦崇
虛飾無則匪其人我言許子厥猶有義匪近惟田心性
之喻故曰聖王人情為田田而弗治稊稗生焉畢力盡
瘁惟農之良禮耕義植人情之防許子勉旃夙夜祇惕
庶幾寡愆以厚其德

近田詩

有田有田不遠以阻東郊西疇厥壤膺膺
我黍我稷我稼我穡昏余作力匪朝伊夕
中田有廬有室有軒桑麻當門榆柳蔭園
雞鳴于陌豚散于野牛辭其軛亦在墻下
言饁于畝率我僕夫時往時還朝不及晡
滌之翼翼使之握握載稠載積堆戶填闕
庖羞佐酒烝嘗安侑惟此伏觴洽我親友

予焉怡怡于焉媿媿率我故常祖先之貽

思夫人生有涯而謀則賒厭厭隘卑乃馳心荒遐

思夫人每忽易而務厥難曷忘乎近安而冒彼遠患悠
悠我懷喟焉永歎

李白祠迎送神詞三章

荆之澧州新建太白祠於蘭江之上余奉使
寓郢獲聞其事因此作詞畀州之人俾落成
之日歌以祀之

蘭江兮悠悠望夫君兮中洲
葯房兮芝宇辛夷為橈兮
桂為柱神之來兮風泠泠
建雲旂兮騎長鯨屋梁兮
明月恍夫君兮見顏色靈
倏忽兮陟降儼左右兮不
可以像靈惠我兮勿夷猶
靈不顧兮我心則憂

右迎神

靈天矯兮既臨坐瑤席兮
顧歆咫尺兮不獲以覩渺
余思兮心猶苦酌清流兮
薦觴採蘭花兮作殽脯鼓
瑟兮吹竽致慇勤兮為君
娛君弗娛兮曷處悵盤桓
兮聊延

佇

右降神

靈香眇兮神軒軒爛宮錦兮翩翩墨花兮飛雨儼龍鸞
兮騰翥歡弗固兮易離望天門兮君欲辭靈風生兮極
浦條其旋兮不涉以遙度顓莫顧兮扳莫留褰余袂兮
願從子于崑崙之丘

右送神

歲聿其暮送朱東原司教東平

歲聿其暮翔翔蕭蕭言策其駕送子於郊
歲聿云暮寒日翳翳傷子不逢感我出涕
驅車轉轉徒御傾傾式邁子行我心用寧
言言東平魯邦之域宮牆崇崇魁子嘉績

金則有礪矣木則有矩矣造爾多士子其處矣

胡子匪宜我獨與子睽離孰輔吾仁孰砥我疵豈無友
朋不如子心知

屋舟詞

江水兮悠悠若有人兮夷猶舟何為兮棟宇屋何為兮
在中流葑櫟兮芝楣照晴波兮參差泛泛兮搖搖宛馮
夷兮來居淺渚兮月明極浦兮雲橫緊高寨兮獨丘何
塵緣兮足縈江水兮茫茫若有人兮徜徉謂舟兮疑屋
謂屋兮可航珠戶兮貝宮掛宿靄兮簾櫳窈窕兮窅兀
結蜃樓兮乘風月明兮淺渚雲橫兮極浦蹇獨立兮高
寨寄一笑於千古

築城詩

為尚代巡城柘林作

我行其野黯黯其陰悄無居人榛莽阻深
我行其野言執其役君子攸為靡遑信宿
翼翼君子觀風省方于焉惻楚于焉徬徨
乃觀流泉乃相原隰乃縱乃橫乃經乃畫
千夫萬杵版築如雨掾之度之以開百堵
窾而翼然雉堞雲連可保可障允固允堅我人攸止可
以安全

有室有廬耕鑿居處于寒于暑于賈于旅長育生齒千

百其祀天子之命監司之賜

詛倭詞

詛倭詞詛倭奴也倭曷詛也嗚呼倭昔暴亂
荼毒吾民吾民怨倭深且極矣恨無以報之
且虞其復至恒惴惴焉乃今大侍御仰山尚
公作城於柘林柘林實松南鄙前臨大海倭
曩據以為巢穴城成倭來不能犯而吾得以
恃賴保障是可以無恐因叙新功追往事作此

辭以詛之或曰倭禽獸善盜其性然也頑狠嚙
兇不可以人理告語如詛何固也激烈訶詆
聊以攄吾人之痛憤且呼天籲神冀有昭格
悔前禍而錫新社吾見天必有以報倭也又
事固難於創而尤難於守貽此詩於土人使
其詠歌感愴常若履兵刃而在急難且傳之
子孫弗忘激勵永保茲城勿壞云其辭曰
蠢爾倭誕敢犯我大邦吾地臨海兮惟大邦之封疆吾

於倭非世仇兮曷加我以暴克乘我不備突而其衝樂
土居民任汝焚劫兵及橫加誰敢爾掣戕我骨肉父母
弟昆漂血暴屍盡室闔門拘繫迫逐無地遯藏死者枕
籍生者奔亡吾與倭兮生並斯世同戴高天同履厚地
爾亦有骨肉兮與我無異戕人虐人兮曷不反已蠢爾
倭赫赫天朝如日大明有翼監司帝命是膺監司遠慮
築城庇我亟謀亟成若有神助監司慈仁恤我孔周百
凡生罔不我謀宅我廬舍給我廩庾睠以師長衛以

卒徒卒徒桓桓若虎若羆蠢爾倭我今來居故業是守
我織我耕幸復我舊我有崇墉爾能越度我有長戟亦
有大斧亦有神砲摧山倒海藥鏃射爾爛汝腸胃我土
非昔捍衛孔固陷穽中藏苦獲四布汝來汝來絕汝歸
路蠢爾倭吾恨汝心死且不朽欲得汝肉飽我豕狗爾
肆無道極惡窮凶天道好還斷不汝容我德監司樂生
已足我惟痛念死生骨肉顙地呼天無地報復皇天上
帝丕顯大神厭惡汝惡我怨庶伸蠢爾倭今天不生汝

少灾害兮皇風清穆世開泰兮爾倭爾倭為蟲豸兮萬
載千年永絕爾類兮



文簡集卷十一